

墨

子

三

新平船

PDG

墨子卷之九

非樂中第三十三闕

非樂下第三十四闕

非命上第三十五

子墨子言曰古者王公大人爲政國家者皆欲國家之富人民之衆刑政之治然而不得富而得貧不得衆而得寡不得治而得亂則是本失其所欲得其所惡是故何也子墨子

言曰執有命者以雜於民間者衆執有命者之言曰命富則富命貧則貧命衆則衆命寡則寡命治則治命亂則亂命壽則壽命夭則夭命雖強勁何益哉上以說王公大人下以駟百姓之從事故執有命者不仁故當執有命者之言不可不明辯然則明辯此之說將奈何哉子墨子言曰必立儀言而毋儀譬猶運鈞之上而立朝夕者也是非利害之辯不

可得而明知也故言必有三表何謂三表子
墨子言曰有本之者有原之者有用之者於
何本之上本之於古者聖王之事於何原之
下原察百姓耳目之實於何用之廢以爲刑
政觀其中國家百姓人民之利此所謂言有
三表也然而今天下之士君子或以命爲有
益蓋嘗尚觀於聖王之事古者桀之所亂湯
受而治之紂之所亂武王受而治之此世未

易民未渝於桀紂則天下亂在於湯武則天下治豈可謂有命哉然而今天下之士君子或以命爲有益嘗尚觀於先王之書先王之書所出國家布施百姓憲也先王之憲亦嘗有曰福不可請而禍不可諱敬無益暴無傷者乎所以聽獄制罪者刑也先王之刑亦嘗有曰福不可請禍不可諱敬無益暴無傷者乎所以整設師旅進退師徒者誓也先王之

誓亦嘗有曰福不可請禍不可諱敬無益暴
無傷者乎是故子墨子言曰吾當未盭數天
下之良書不可盡計數大方論數而五者是
也今雖毋求執有命者之言不必得不亦可
錯乎今用執有命者之言是覆天下之義覆
天下之義者是立命者也百姓之誅也說百
姓之誅者是滅天下之人也然則所爲欲義
在上者何也曰義人在上天下必治上帝山

川鬼神必有幹主萬民被其大利何以知之
子墨子曰古者湯封於亳絕長繼短方地百
里與其百姓兼相愛交相利移則分率其百
姓以上尊天事鬼是以天鬼富之諸侯與之
百姓親之賢士歸之未歿其世而王天下政
諸侯昔者文王封於岐周絕長繼短方地百
里與其百姓兼相愛交相利則是以近者安
其政遠者歸其德聞文王者皆起而趨之罷

不肖股肱不利者處而願之曰奈何乎使文
王之地及我吾則吾利豈不亦猶文王之民
也哉是以天鬼富之諸侯與之百姓親之賢
士歸之未歿其世而王天下政諸侯卿者言
曰義人在上天下必治上帝山川鬼神必有
幹主萬民被其大利吾用此知之是故古之
聖王發憲出令設以爲賞罰以勸賢是以入
則孝慈於親戚出則弟長於鄉里坐處有度

出入有節男女有辨是故使治官府則不盜
竊守城則不崩叛君有難則死出亡則送此
上之所賞而百姓之所譽也執有命者之言
曰上之所賞命固且賞非賢故賞也上之所
罰命固且罰不暴故罰也是故入則不慈孝
於親戚出則不弟長於鄉里坐處不度出入
無節男女無辨是故治官府則盜竊守城則
崩叛君有難則不死出亡則不送此上之所

罰百姓之所非毀也執有命者言曰上之所
罰命固且罰不暴故罰也上之所賞命固且
賞非賢故賞也以此爲君則不義爲臣則不
忠爲父則不慈爲子則不孝爲兄則不良爲
弟則不弟而強執此者此持凶言之所自生
而暴人之道昔然則何以知命之爲暴人之
道昔上世之窮民貪於飲食惰於從事是以
衣之財不足而飢寒凍餒之憂至不知曰我

罷不肖從事不疾必曰我命固且貧苦上世
暴王不忍其耳目之淫心涂之辟不順其親
戚遂以亡失國家傾覆社稷不知曰我罷不
肖爲政不善必曰吾命固失之於仲虺之告
曰我聞于夏人矯天命布命于下帝伐之惡
龔喪厥師此言湯之所以非桀之執有命也
於太誓曰紂夷處不肯事上帝鬼神禍厥先
神禋不祀乃曰吾民有命無謬排扁天亦縱

之棄而弗葆此言武王所以非紂執有命也
今用執有命者之言則上不聽治下不從事
上不聽治則刑政亂下不從事則財用不足
上無以共粢盛酒醴祭祀上帝鬼神降綏天
下賢可之士外無以應待諸侯之賓客內無
以食飢衣寒將養老弱故命上不利於天中
不利於鬼下不利於人而強執此者此持凶
言之所自生而暴人之道也是故子墨子言

曰今天下之士君子忠實欲天下之富而惡其貧欲天下之治而惡其亂執有命者之言不可不非此天下之大害也

非命中第三十六

子墨子言曰凡出言談由文學之爲道也則不可而不先立義法若言而無義譬猶立朝夕於負鈞之上也則雖有巧工必不能得正焉然今天下之情僞未可得而識也故使言

有三法三法者何也有本之者有原之者有用之者於其本之也考之天鬼之志聖王之事於其原之也徵以先王之書用之奈何發而爲刑此言之三法也今天下之士君子或以命爲亡我所以知命之有與亡者以衆人耳目之情知有與亡有聞之有見之謂之有莫之聞莫之見謂之亡然胡嘗考之百姓之情自古以及今生民以來者亦嘗見命之物

九思卷之九
聞命之聲者乎則未嘗有也若以百姓爲愚
不肖耳目之情不足因而爲法然則胡不嘗
考之諸侯之傳言流語乎自古以及今生民
以來者亦嘗有聞命之聲見命之體者乎則
未嘗有也然胡不嘗考之聖王之事古之聖
王舉孝子而勸之事親尊賢良而勸之爲善
發憲布令以教誨賞罰以勸沮若此則亂者
可使治而危者可使安矣若以爲不然昔者

桀之所亂湯治之紂之所亂武王治之此世
不渝而民不改上變政而民易教其在湯武
則治其在桀紂則亂安危治亂在上之發政
也則豈可謂有命哉夫曰有命云者亦不然
矣今夫有命者言曰我非作之後世也自昔
三代之有若言以傳流矣今故先生對之曰夫
有命者不志昔也三代之聖善人與意亡昔
三代之暴不肖人也何以知之初之列士桀

大夫慎言知行此上有以規諫其君長下有以教順其百姓故上有以規諫其君長下有以教順其百姓故上得其君長之賞下得其百姓之譽列士桀大夫聲聞不廢傳流至今而天下皆曰其力也一不顧其國家百姓之政繁爲無用暴逆百姓使下不親其上是故國爲虛厲身在刑僇之中必不能曰我見命焉是故昔者三代之暴王不繆其耳目之淫